

# Quità pastoral per ils attempads

## Ils teologs laics èn sa cussegliads

■ (cp) **Tar la sesida da primavaira, ils 21 d'avrigl 2016 a Cuira è il Cussegl dals teologs laics e diacons da l'uestgieu sa fatschentà cun la pastoraziun tar attempads. Gist tenor giavisch dal cussegl èn perquai temas vegnids resguardads, preparads da la cumission da perfecziun sco «Care palliativ ed accompagnament da moribunds».**

Avant la sesida han commembers dal cussegl respundì a dumondas che pertutgan la lavur pastorala cun senioras e seniors en lur plaivs. Resumond las respostas èsi sa mussà nua che meglieraments pertutgant l'offerta èn inditgads. La lavur classica tar la vegliadetgna, ch'i dat durant il temp liber da quella, va plitost enavos e vegn ademplita per gronda part dad autras varts. Carstgauns pli vegls èn sur sazes e pon eleger la purschida.

Autra è la situaziun en la davosa fasa da la vita, segnada da malsogna e da spegtar sin la mort. Quà èsi dad agir – tenor il cussegl – cun coordinar la pastoraziun en spital ed en la plaiv tras ina purschida qualifitgada tranter spirituals e laics, tar dar ils s. sacraments e la scolaziun da voluntaris e tgirunzs. Il cussegl metta ses focus sin la lavur cun la vegliadetgna en la davosa fasa. Questa tematica duai anc vegnir approfondada.

### «Il num da Dieu è misericordia»

Papa *Francesg* preschenta sias intenziuns il meglier cu el discorra libramain, per sumeglia en intervistas sco tala sut il titel «Il num da Dieu è misericordia». Il vicari episcopal, *Joseph Maria Bonnemain*, ha elegì prudentamain passaschas ch'ins ha legì da cuminanza en il cussegl. Ils com-

members da quel eran impressiunads co il papa chapescha da sa mover tranter mantegnair la ductrina da la baselgia e da far valair il maximum da la misericordia divina visavi ils carstgauns.

### L'uestg Vitus Huonder è stà absent

Il cussegl ha deplorà fitg che l'uestg *Vitus Huonder* ha stuì sa perstgisar a curt termin. I fiss stà fitg interessant dad intervegnir la posiziun da l'uestg davart il messadi dal papa pertutgant «Amoris Laetitia». Il cussegl dals teologs laics è s'exprimi per ina sesida cuminaivla cun il cussegl presbiterial il settember ed uschia pudair tractar il messadi dal papa. Ins vul resguardar las diversas interpretaziuns dal document ch'ins ha puidi constatar en ils commentaris. Era davart las consequenzas praticas duai vegnir sa cusseglià.